

“РЎЙХАТГА ОЛИНГАН”

Ўзбекистон Республикаси

Марказий банки томонидан

2023 йил “4” май да 92 сон



“ЯНГИ БАНК” акциядорлик
жамиятининг ягона акциядори
масъулияти чекланган жамияти
“YANGI-GROUP” шаклидаги
хорижий корхонаси ягона
иштирокчисининг
2022 йил “25” октябрдаги
2-сонли қарори билан

“ТАСДИҚЛАНГАН”



**“ЯНГИ БАНК”
АКЦИЯДОРЛИК ЖАМИЯТИНИНГ
УСТАВИ**

Тошкент ш. – 2023 й.

I. УМУМИЙ ҚОИДАЛАР

1. “ЯНГИ БАНК” акциядорлик жамияти (кейинчалик «**банк**» деб юритилади) банк ҳисобварақларини очиш ва юритиш, тўловларни амалга ошириш, омонатларга (депозитларга) пул маблағларини жалб этиш, ўз номидан кредитлар бериш бўйича банк фаолияти сифатида аниқланган операциялар мажмуини амалга оширувчи тижорат ташкилоти бўлган юридик шахс ҳисобланади.

2. Банк, унинг ягона акциядори ҳисобланадиган масъулияти чекланган жамияти “YANGI-GROUP” шаклидаги хорижий корхонаси (кейинчалик “**Ягона акциядор**”) ягона иштирокчисининг 2022 йил “25” октябрдаги 2-сонли қарорига биноан акциядорлик жамияти шаклида ташкил қилинди.

3. Банк ўз фаолиятида Ўзбекистон Республикаси Конституцияси, Ўзбекистон Республикаси Фуқаролик кодекси ва Ўзбекистон Республикасининг “Банклар ва банк фаолияти тўғрисида”ги, “Қимматли қоғозлар бозори тўғрисида”ги, “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги қонунлари ва бошқа қонунлар, Ўзбекистон Республикаси Олий Мажлиси палаталари қарорлари, Ўзбекистон Республикаси Президентининг фармон, қарор, фармойишлари, Ўзбекистон Республикаси Вазирлар Маҳкамаси қарорлари, Ўзбекистон Республикаси Марказий банкнинг меъёрий ҳужжатлари ва бошқа қонун ҳужжатларига, шунингдек мазкур Уставга асосланган ҳолда фаолият олиб боради .

4. Банк Ўзбекистон Республикасининг банк тизими таркибига кирази ва мижозларга хизмат кўрсатиш жараёнини соддалаштирадиган ва инновацион банк технологияларидан фаол фойдаланишга имкон берувчи масофадан туриб, шунингдек қонунчиликда белгиланган тартибда ўз филиаллари, банк хизматлари офислари ҳамда ваколатхоналари орқали юқори сифатли банк хизматларини тақдим этадиган банк ҳисобланади.

Ушбу Уставда Банкнинг кундалик хўжалик фаолияти деганда Ўзбекистон Республикаси “Банклар ва банк фаолияти тўғрисида”ги Қонунинг (янги тахрирда) 5-моддасида кўрсатиб ўтилган банк операциялари тушунилади. Шунингдек, Банкнинг кундалик хўжалик фаолияти деганда, банк томонидан берилган кредитлар (бўлиб-бўлиб сотиш, лизинг) бўйича қарздорлик ҳисобига қабул қилинган гаров ва ипотека мулкларини келгусида реализация қилиш билан боғлиқ бўлган битимлар (олди-сотди, бўлиб-бўлиб тўлашга сотиш, кредит, лизинг кабилар) тушунилади.

5. Банкни ташкил қилиш ва фаолиятидан мақсад - Ўзбекистон Республикаси ҳудуди ва ундан ташқарида фойда олиш учун амалдаги қонун ҳужжатларида таъқиқланмаган банк ва молиявий фаолиятни амалга ошириш, шунингдек ушбу фаолият билан боғлиқ бўлган хизматларни кўрсатиш, банк ва бошқа молиявий хизматлар бозорида рақобатни кучайтириш ва мижозларга хизмат кўрсатиш сифатини, шу жумладан масофадан туриб инновацион технологиялардан фойдаланган ҳолда яхшилаш.

6. Банкнинг тўлиқ номи:

ўзбек тилида:

-кирилл алифбосида: “ЯНГИ БАНК” акциядорлик жамияти;

-лотин алифбосида: “YANGI BANK” aksiyadorlik jamiyati.

рус тилида: Акционерное общество «ЯНГИ БАНК».

инглиз тилида: Joint stock company “YANGI BANK”.

Банкнинг қисқартирилган номи:

ўзбек тилида:

-кирилл алифбосида: “ЯНГИ БАНК” АЖ;

-лотин алифбосида: “YANGI BANK” AJ.

рус тилида: АО «ЯНГИ БАНК».

инглиз тилида: JSC “YANGI BANK”.

7. Банк юридик шахс бўлиб, у ўз мустақил балансида ҳисобга олинадиган алоҳида мол-мулкка, шу жумладан ўзининг устав капиталига берилган мол-мулкка эга бўлади, ўз номидан мулкӣ ва шахсий номулкӣ ҳуқуқларни олиши ҳамда амалга ошириши, зиммасига мажбуриятлар олиши, судда даъвогар ва жавобгар бўлиши мумкин.

8. Банк Ўзбекистон Республикасида филиаллар, банк хизматлари офислари ва бошқа алоҳида бўлинмалар очиши мумкин. Банк филиали банкнинг юридик шахс бўлмаган, банк номидан банк фаолиятини амалга оширувчи ва банк томонидан ўзига берилган ваколатлар доирасида ҳаракат қилувчи алоҳида бўлинмаси ҳисобланади.

9. Банк Марказий банкнинг рухсатномаси билан қуйидаги ҳолларда чет элда шўъба банклар очиши ва филиаллар ташкил этиши, банкларнинг капиталида иштирок этиши, шу жумладан чет эл банкларини ташкил этишда иштирок этиши мумкин:

Марказий банк ва қабул қилувчи мамлакатнинг банк назорати органи билан ахборот айирбошлаш тўғрисида келишув мавжуд бўлганда;

қабул қилувчи мамлакатнинг қонунчилик ва унинг қўлланилиш услубиети Марказий банк томонидан шўъба банк, филиал устидан назорат вазифаларини бажаришига тўсқинлик қилмаганда;

банкнинг бошқаруви ва молиявий ҳолати шўъба банк, филиал орқали амалга ошириладиган, режалаштирилаётган фаолият учун етарли бўлганда;

пруденциал нормативлар кўрсаткичларига риоя этилганда ва улар ўсиб борганда ҳамда банклар ва банк фаолияти тўғрисидаги қонун ҳужжатларининг бошқа талабларига мувофиқ бўлганда;

Банкнинг шўъба банклари ҳамда ваколатхоналари улар очиладиган ва (ёки) ташкил этиладиган мамлакат қонунчилигига мувофиқ очилади ва (ёки) филиаллари ташкил этилади.

10. Банк маблағларнинг сақланиши, ҳамда омонатчилар олдидаги мажбуриятларининг бажарилиши учун, шу жумладан тўловлар бир банкдан бошқа банкка ўз вақтида ўтиши ҳамда маблағларнинг корхоналар ва ташкилотлар ҳисобварақларига киритилиши учун ўз миждозлари ва омонатчилари олдида жавобгардир.

Ягона акциядор банкнинг мажбуриятлари юзасидан жавобгар бўлмайди ва унинг фаолияти билан боғлиқ зарарларнинг ўрнини ўзига тегишли акциялар қиймати доирасида қоплаш таваккалчилигини ўз зиммасига олади.

Акциялар ҳақини тўлиқ тўламаган Ягона акциядор банк мажбуриятлари юзасидан ўзига тегишли акциялар қийматининг тўланмаган қисми доирасида солидар жавобгар бўлади.

Банк Ягона акциядор мажбуриятлари юзасидан жавобгар бўлмайди.

Банк давлатнинг мажбуриятлари бўйича, давлат эса банкнинг мажбуриятлари бўйича жавоб бермайди, бундан банкнинг ёки давлатнинг ўзи бундай мажбуриятларни зиммасига олиш ҳоллари мустасно.

Банк молиявий операцияларни амалга ошириш билан боғлиқ қарорлар қабул

қилишда мустақилдир.

11. Банк чекланмаган муддатга таъсис этилган.

12. Банк ўз тимсолига, Ўзбекистон Республикасининг давлат тилидаги тўлик фирма номи ва тимсоли тасвири туширилган муҳрига эга.

13. Банкнинг юридик ва почта манзили: 100084, Ўзбекистон Республикаси, Тошкент шаҳри, Юнусобод тумани, Амир Темур кўчаси 99-уй;
электрон почта манзили: info@yangibank.uz;
расмий веб-сайти: www.yangibank.uz.

II. БАНК ОПЕРАЦИЯЛАРИ

14. Банк ўз фаолиятида қуйидаги молиявий операцияларни амалга оширади:
пул маблағларини омонатларга (депозитларга) жалб этиш;
тўловларни амалга ошириш, шу жумладан банк ҳисобварақларини очмасдан амалга ошириш;

жисмоний ва юридик шахсларнинг банк ҳисобварақларини, шу жумладан банкларнинг вакиллик ҳисобварақларини очиш ҳамда юритиш;

кредитларни уларнинг қайтарилиши, фоизлилиги ва муддатлилиги шарти билан ўз номидан ўзининг маблағлари ҳамда жалб этилган маблағлар ҳисобидан бериш;

чет эл валютаси билан нақд ва нақдсиз шакллардаги операцияларни амалга ошириш;

жисмоний ёки юридик шахс билан тузилган шартнома бўйича мол-мулкни ишончли бошқариш;

инкассация ва касса хизматларини кўрсатиш;

учинчи шахслар номидан уларнинг мажбуриятлари бажарилишини назарда тутувчи кафолатлар бериш ва бошқа мажбуриятларни қабул қилиш;

учинчи шахслардан пул шаклидаги мажбуриятларнинг бажарилишини талаб қилиш ҳуқуқини олиш (факторинг);

қимматли қоғозларни чиқариш, харид қилиш, сотиш, уларнинг ҳисобини юритиш ва уларни сақлаш, миждоз билан тузилган шартномага биноан қимматли қоғозларни бошқариш, улар билан бошқа операцияларни бажариш;

аффилиланган қимматбаҳо металллар сотиб олиш ва сотиш, шу жумладан металлларни масъул сақлаш ҳисобварақларини ҳамда металлларнинг эгасизлантирилган (жисмоний бўлмаган) ҳисобварақларини юритиш;

қимматбаҳо металллардан ясалган тангаларни сотиб олиш ва сотиш;

ҳосилавий молия воситалари (деривативлар) билан операцияларни амалга ошириш;

ҳужжатларни ёки қимматликларни сақлаш учун махсус биноларни ёки уларнинг ичидаги сейфларни ижарага бериш;

лизинг бериш;

қонунчиликда назарда тутилган шаклларда қарзлар бериш;

активлар мажмуини (портфелини) бошқариш;

электрон пулларни чиқариш, улардан фойдаланиш ва тўлаш;

банк карталарини бериш ва тўловларга ишлов бериш, банк карталарига бошқа ташкилотлар, жумладан бошқа молия институтлари билан биргаликда хизмат кўрсатиш.

Банк банклар ва банк фаолияти тўғрисидаги қонун ҳужжатларига мувофиқ бошқа молиявий операцияларни ҳам амалга оширади.

15. Банк Ўзбекистон Республикасида ўз фаолиятини Марказий банк томонидан бериладиган банк фаолиятини амалга ошириш ҳуқуқини берувчи лицензия асосида юритади.

Банк банк фаолиятини амалга ошириш ҳуқуқини берувчи лицензияда кўрсатилмаган молиявий операцияларни амалга оширишга ҳақли эмас.

16. Банк аҳоли, корхоналар, ташкилотлар, кредит ва молия институтлари, шу жумладан норезидентларнинг бўш турган пул маблағларини жалб қилади ва уларни талаб қилиб олингунча сақланадиган депозит ҳисоб варақларида, омонат, муддатли депозит ҳисоб варақларида, шунингдек бошқа турдаги депозит ҳисобварақлари ва мажбурият ҳисобварақларида сақлайди.

17. Банк корхоналар, бирлашмалар, ташкилотлар, муассасалар ва фуқароларга кредитнинг муддатлилиқ, қайтаришлиқ ва фоизлиқ принциплари асосида миллий валюта - сўмда ёки чет эл валютасида кредитлашни амалга оширади.

Банк томонидан бериладиган кредитлар, қоида тариқасида, амалдаги қонун ҳужжатларига мувофиқ ундириш мумкин бўлган мол-мулк гарови, шунингдек кафолатлар, кафилликлар, банк тажрибасида қабул қилинган бошқа шакллардаги мажбуриятлар билан таъминланади. Банк бу кафолатлар, кафилликлар, мажбуриятларнинг етарлилигини ўз кредит сиёсати ҳамда Марказий банк қоида ва тавсияларини ҳисобга олган ҳолда белгилайди.

18. Банк Ўзбекистон Республикасининг қонун ҳужжатларида кўзда тутилган тартибда қимматли қоғозлар бозорида профессионал фаолиятни амалга ошириши мумкин.

III. БАНК УЧУН ТАЪҚИҚЛАНГАН ЁКИ ЧЕКЛАНГАН ФАОЛИЯТ

19. Банк бевосита ишлаб чиқариш, савдо, суғурта фаолияти ва Ўзбекистон Республикасининг “Банклар ва банк фаолияти тўғрисида”ги Қонунда назарда тутилган молиявий операцияларни амалга ошириш билан боғлиқ бўлмаган бошқа фаолият билан шуғулланишга ҳақли эмас.

20. Ушбу Уставнинг 18-бандида кўрсатилган чеклов қуйидаги ҳолларга нисбатан татбиқ этилмайди:

банк карталари асосида нақд пулсиз ҳисоб-китоблар тизимларида фойдаланиладиган ихтисослаштирилган усқунани ва унга доир дастурий таъминотни сотиш ёки ижарага беришга;

ўз активларини сотишга;

чек дафтарчаларини чиқариш, реализация қилиш ва тарқатишга;

суғурта ташкилотлари бўлган Ўзбекистон Республикаси резидентлари номидан суғурта шартномаси тузилишини ташкил этиш бўйича фаолиятни амалга оширишга;

банк ўзи муассис бўлган юридик шахсларга ўз мол-мулкни мулк ижара (аренда) шартномасига мувофиқ ижарага беришга.

21. Банкка юридик шахсларни ташкил этиш ва (ёки) юридик шахсларнинг устав фондларидаги (устав капиталларидаги) улушларни ёки акцияларни олиш тақиқланади, бундан қуйидагилар мустасно:

кредит, суғурта ва лизинг операцияларини профессионал асосда амалга оширувчи юридик шахслар;

молия бозори инфратузилмасининг бир қисми бўлган ёки банкларга ахборот ва маслаҳат хизматларини кўрсатувчи юридик шахслар;

қимматли қоғозлар бозорида профессионал фаолиятни амалга оширувчи юридик шахслар;

банкнинг кафолати остида қимматли қоғозларни чиқариш ва жойлаштириш

мақсадида мазкур банкнинг хорижда ташкил этиладиган шўъба ташкилотлари;
фақат инкассация фаолияти билан шуғулланувчи юридик шахслар;
банк операциялари бўйича ҳисоб-китоблар, шу жумладан банк карталари билан операцияларга доир ҳисоб-китоблар иштирокчилари ўртасида ўзаро боғлиқлигини таъминлаш бўйича хизматлар кўрсатувчи юридик шахслар;
фонд ва валюта биржалари;
кредит бюrolари;
қимматли қоғозларнинг иккиламчи бозорига жойлаштирилган акцияларнинг йигирма фоизидан ортиқ бўлмаган миқдорда фонд биржаси листингига киритилган акциядорлик жамиятлари.

22. Банк томонидан бир юридик шахснинг устав фондидаги (устав капиталидаги) улушларини ёки акцияларини олиш банкнинг биринчи даражали регулятив капиталининг ўн беш фоизидан ошмаслиги керак. Ушбу чеклов банк томонидан мазкур юридик шахсларнинг устав фондидаги (устав капиталидаги) улушларига ёки акцияларига эгаллик қилишга, шу жумладан мазкур юридик шахсларнинг ташкил этилиши ҳолларига нисбатан ҳам татбиқ этилади.

23. Банк томонидан қимматли қоғозлар билан битимларни амалга ошириш, юридик шахсларнинг устав фондидаги (устав капиталидаги) улушларини ёки акцияларини сотиб олиш йиғиндиси банкнинг биринчи даражали регулятив капиталининг эллик фоизидан ошмаслиги керак.

24. Банкнинг юридик шахслар устав фондидаги (устав капиталидаги) улушларига ёки акцияларига эгаллик қилиш 21 – 22 бандларда кўрсатилган миқдордан ортиқ бўлса, ушбу ортган қисмни бир йил ичида сотиши шарт.

25. Банк устав капиталининг бир ёки ундан ортиқ фоизига эгаллик қилувчи юридик шахснинг устав фондида (устав капиталида) иштирок этиш таъқиқланади.

26. Банк томонидан бошқа банкнинг акцияларини ёки ўзга банк сақловчиси бўлган бошқа қимматли қоғозларни ёхуд ўзга банкка тегишли юридик шахслар устав фондидаги (устав капиталидаги) улушларни ёки акцияларни улар томонидан қўшиб юбориш ёки қўшиб олиш шаклида қайта ташкил этиш амалга оширилаётганда олиш ҳолларига нисбатан юқоридаги чекловлар татбиқ этилмайди.

IV. БАНК УСТАВ КАПИТАЛИ

27. Банкнинг устав капитали Ягона акциядор олган банк акцияларининг номинал қийматидан ташкил топиб, Ўзбекистон Республикасининг миллий валютасида ифодаланади ва ўз кредиторлари манфаатларини кафолатлайдиган банк мол-мулкнинг энг кам миқдорини белгилайди.

28. Банкнинг устав капитали Ўзбекистон Республикаси миллий валютасида шакллантирилади ҳамда Ягона акциядор киритган пул маблағларидан ташкил топади, бундан қуйидаги ҳоллар мустасно:

банк акцияларини банкнинг кредиторлари орасида жойлаштириш ва банкнинг кредиторлар олдидаги пул мажбуриятлари бўйича ҳар қандай ҳуқуқларини (талабларини) ҳисобга олиш йўли билан уларнинг ҳақини тўлаш;

қимматли қоғозларни Банк акцияларига айирбошлаш;

Банкнинг жойлаштирилган бир турдаги акцияларини ушбу банкнинг бошқа турдаги акцияларига алмаштириш.

Банкнинг устав капиталини шакллантириш учун кредитга, гаровга олинган маблағлардан, шунингдек мажбурият юклатилган бошқа маблағлардан фойдаланишга йўл қўйилмайди.

29. Банк оддий акцияларни жойлаштириши шарт, шунингдек имтиёзли акцияларни жойлаштиришга ҳақли. Банкнинг барча акциялари эгаси ёзилган, эмиссион қимматли қоғозлардир.

Банкнинг барча турдаги акциялари 1 000 (бир минг) сўмни ташкил этадиган номинал қийматга эга.

30. Банкнинг устав капитали 100 000 000 000 (бир юз миллиард) сўмни ташкил этади ва қуйидаги акцияларга тақсимланади:

эгасининг номи ёзилган оддий акциялар - номинал қиймати 1 000 (бир минг) сўм бўлган 100 000 000 (бир юз миллион) дона миқдорда.

31. Банкнинг устав капитали миқдорини ошириш Ўзбекистон Республикасининг амалдаги қонун ҳужжатларида ва мазкур Уставда кўрсатилган тартибда амалга оширилади.

32. Банк устав капиталини қўшимча акциялар жойлаштириш йўли билан кўпайтириш ва Банк уставига тегишли ўзгартиришлар киритиш, шунингдек эълон қилинган акцияларнинг энг кўп миқдорини белгилаш ҳақидаги қарор Ягона акциядор томонидан қабул қилинади.

Қўшимча акциялар Банк уставига белгиланган эълон қилинган акциялар сони доирасидагина банк томонидан жойлаштирилиши мумкин.

Банкнинг устав капиталини қўшимча акцияларни жойлаштириш йўли билан кўпайтириш тўғрисидаги қарорда жойлаштириладиган қўшимча оддий акциялар ёки имтиёзли акцияларнинг сони, уларни жойлаштириш муддатлари ва шартлари, шунингдек қўшимча акцияларнинг жойлаштириш нархи белгиланган бўлиши керак.

33. Банк устав капиталини қўшимча акциялар жойлаштириш йўли билан кўпайтириш жойлаштирилган қўшимча акцияларнинг номинал қиймати миқдорида қайд этилади. Бунда эълон қилинган муайян тоифа ва турдаги акцияларнинг миқдори жойлаштирилган ана шу тоифа ва турлардаги акцияларнинг сонига қисқартирилади.

Банк устав капиталини қўшимча акцияларни жойлаштириш йўли билан кўпайтириш қонунчиликда белгиланган тартибда, жалб қилинган инвестициялар, банкнинг ўз капитали ва ҳисобланган дивидендлар ҳисобидан амалга оширилиши мумкин.

Банк устав капиталини унинг ўз капитали ҳисобидан қўшимча акцияларни жойлаштириш йўли билан кўпайтиришда бу акциялар Ягона акциядор эгалигига ўтади. Банк устав капитали кўпайтирилиши натижасида кўпайтириш суммасининг битта акциянинг номинал қийматига мувофиқлиги таъминланмайдиган бўлса, банк устав капиталини кўпайтиришга йўл қўйилмайди.

34. Агар қонун ҳужжатларида бошқача ҳолат кўзда тутилмаган бўлса, банкнинг устав капиталини акциялар номинал қийматини ошириш йўли билан кўпайтиришга йўл қўйилмайди.

35. Банкнинг устав капитали акцияларнинг номинал қийматини ёки уларнинг умумий сонини қисқартириш йўли билан, шу жумладан акцияларнинг бир қисмини кейинчалик бекор қилган ҳолда банк томонидан акцияларни олиш йўли билан

камайтирилиши мумкин.

Устав капиталини камайтириш ҳамда банк Уставига тегишли ўзгартиришлар киритиш тўғрисидаги қарор Ягона акциядор томонидан қабул қилинади. Устав капиталини камайтириш тўғрисида қарор қабул қилган вақтда Ягона акциядор капитални камайтириш сабабларини кўрсатади ва уни камайтириш тартибини белгилайди.

Банк ўз акцияларини сотиб олиш учун Марказий банкнинг дастлабки рухсатномасини олиши шарт. Банк томонидан сотиб олинadиган ўз акцияларининг суммаси банк устав капиталининг ўн фоизидан ошмаслиги лозим.

36. Банк ўзи чиқараётган акцияларга уларни оммавий жойлаштириш йўли билан қонун ҳужжатлари талабларини ҳисобга олган ҳолда очик обуна ўтказишга ёки уларни хусусий жойлаштириш йўли билан ёпиқ обуна ўтказишга ҳақли.

Жойлаштирилаётган акцияларнинг сони акцияларни чиқариш тўғрисидаги қарорда кўрсатилган миқдордан кўп бўлмаслиги лозим.

Банк томонидан қўшимча акцияларни ва бошқа эмиссиявий қимматли қоғозларни жойлаштириш муддати уларнинг чиқарилиши давлат рўйхатидан ўтказилган пайтдан бошлаб бир йилдан ошмаслиги керак.

Банк томонидан акцияларни ва акцияларга айирбошланадиган қимматли қоғозларни жойлаштириш усуллари (очик ёки ёпиқ обуна) Ягона акциядор қарори билан белгиланади. Банк акцияларини ва акцияларга айирбошланадиган қимматли қоғозларни жойлаштириш услуги тўғрисида кўрсатма бўлмаса, жойлаштириш фақатгина очик обуна йўли билан амалга оширилиши мумкин.

V. БАНКНИНГ ҲУҚУҚ ВА МАЖБУРИЯТЛАРИ

37. Банк молиявий операцияларни амалга ошириш билан боғлиқ қарорлар қабул қилишда мустақилдир.

38. Банк қуйидаги ҳуқуқларга эга:

омонатлар ва берилadиган кредитлар бўйича фоиз ставкаларини мустақил белгилаш;

шартнома асосида депозит ва кредитлар шаклида бошқа банкларнинг маблағларини жалб қилиш ҳамда маблағларни бошқа банкларда жойлаштириш;

ташқил этиладиган ҳисоб-китоб маркази ва вакиллик ҳисобварақлари орқали ҳисоб- китобларни амалга ошириш;

банк операциялари бўйича воситачилик тўловлари миқдорини мустақил белгилаш; лицензияда ва банк Уставида кўзда тутилган, ўз молия-хўжалик фаолиятини амалга ошириш учун зарур бўлган бошқа хатти-ҳаракатлар ва операцияларни амалга ошириш.

39. Банк қуйидагиларга мажбур:

банкнинг устав капиталидаги улушларга бевосита ва билвосита эгалик қилувчиларнинг, шу жумладан охириги бенефициар мулкдорнинг шахси ва улушининг миқдори тўғрисидаги мавжуд маълумотларни Марказий банкнинг сўровномасига биноан тақдим этиш;

молиявий барқарорлигини таъминлаш ҳамда омонатчилар ва кредиторларнинг манфаатларини ҳимоя қилиш мақсадида ҳисоблаб чиқариш тартиби ва йўл қўйилadиган қийматлари Марказий банк томонидан белгиланадиган пруденциал нормативларга риоя этиш;

активлар бўйича йўқотишларга оид таваккалчиликни камайтириш мақсадида ўзининг капиталини ва ликвид ресурсларини етарли даражада сақлаб туриш, активлар бўйича эҳтимоллий йўқотишларга қарши захираларни активларни таснифлаш асосида шакллантириш, шунингдек ўз активларининг диверсификация қилинишини таъминлаш;

Марказий банк томонидан белгиланган мажбурий захиралаш талабларини

бажариш;

Марказий банк томонидан белгиланган ички назоратга ҳамда таваккалчиликларни бошқариш тизимига доир талабларга риоя этиш;

жиноий фаолиятдан олинган даромадларни легаллаштиришга, терроризмни молиялаштиришга ва оммавий қирғин қуролини тарқатишни молиялаштиришга қарши курашиш тўғрисидаги қонун ҳужжатлари талабларига риоя этиш;

Марказий банк топшириғига мувофиқ Ўзбекистон Республикаси давлат бюджетининг касса ижроси бўйича операцияларни амалга ошириш;

бериладиган кредитларни, гаров (шу жумладан мол-мулк шаклидаги), кафолатлар, кафилликлар ва мажбуриятларнинг етарлилигини ҳисобга олган ҳолда таъминланишининг ички тартибини белгилаш;

банкда ички аудит хизмати мавжуд бўлишини таъминлаш;

ўз мижоз ва вакилларининг операциялари, ҳисобварақлари ҳамда омонатлари бўйича махфийликни таъминлаш;

ўз фаолияти тўғрисидаги ахборотни Марказий банк белгилаган тартибда ошкор этиш.

40. Марказий банк предмети ёки мазмуни қуйидагилардан иборат бўлган ҳар қандай тузилган келишув тўғрисида хабардор этилиши керак:

банк устидан назоратни амалга оширувчи шахсларнинг умумий йиғилишларида овоз бериш ҳуқуқини келишилган ҳолда амалга ошириш;

банк бошқаруви органи аъзоларининг ёки банк устидан назоратни амалга оширувчи шахсларнинг келишилган ҳолда фаолият кўрсатиши;

банк бошқаруви ёки кузатув кенгаши аъзоларининг номзодларнинг ёхуд банк устидан назоратни амалга оширувчи шахсларнинг кўпчилиги номзодини кўрсатиш ҳуқуқини амалга ошириш.

41. Банк ўз мижози ва вакилларининг операциялари, ҳисобварақлари ҳамда омонатлари бўйича сирини кафолатлайди. Банк сирини ташкил этувчи маълумотлар мижознинг (вакилнинг) ўзига, мижоз томонидан ваколат берилган вакилга ва қонун ҳужжатларида белгиланган тартибда бошқа шахсларга берилади.

VI. БАНК АКЦИЯДОРИ

42. Юридик ва жисмоний шахслар, шунингдек Ўзбекистон Республикасининг норезидентлари амалдаги қонун ҳужжатлари билан белгиланган тартибда банк акциядорлари бўлиши мумкин.

Норезидент бўлган жисмоний шахсларнинг ва халқаро молия институтлари, чет эл банклари ва бошқа кредит ташкилотлари бўлмаган юридик шахсларнинг жами улуши банк устав капиталининг эллик фоизидан ошмаслиги керак.

Қайси норезидентларнинг иштирокчилари (акциядорлари) ҳамда охирги бенефициар мулкдорлари имтиёзли солиқ режимини тақдим этувчи ва (ёки) охирги бенефициар мулкдорнинг шахсини ошкор этишни ҳамда молиявий операцияларни ўтказиш чоғида ахборот тақдим этишни назарда тутмайдиган давлатда ёки ҳудудда рўйхатга олинган бўлса, ўша норезидентлар банк муассислари ва акциядорлари бўлиши мумкин эмас.

43. Ягона акциядор қуйидаги ҳуқуқларга эга:

банкнинг акциядорлари реестрига киритилиш;

депозитарийдаги депо ҳисобварағидан ўзига тааллуқли кўчирма олиш;

банк фойдасининг бир қисмини дивидендлар тарзида олиш;

банк тугатилган тақдирда ўзига тегишли улушга мувофиқ мол-мулкнинг бир қисмини олиш;

Ягона акциядор ваколатига кирадиган масалалар бўйича қарор қабул қилиш орқали банкни бошқаришда иштирок этиш;

белгиланган тартибда банкнинг молиявий-хўжалик фаолияти натижалари тўғрисида тўлиқ ва ишончли ахборот олиш;

олган дивидендини эркин тасарруф этиш;

қонун ҳужжатларида белгиланган тартибда банкдан унга тегишли бўлган акцияларнинг ҳаммаси ёки бир қисмини сотиб олишини талаб қилиш;

қимматли қоғозлар бозорини тартибга солиш бўйича ваколатли давлат органида, шунингдек судда ўз ҳуқуқларини ҳимоя қилиш;

ўзига етказилган зарарнинг ўрни қопланишини белгиланган тартибда талаб қилиш; ўз манфаатларини ифодалаш ва ҳимоя қилиш мақсадида уюшмалар ва бошқа нодавлат ноижорат ташкилотларига бирлашиш;

банк акцияларини олишда зарар кўриш, шу жумладан бой берилган фойда билан боғлиқ таваккалчиликни суғурта қилиш;

Ягона акциядор ва инвесторлар учун банк сири ва махфий маълумотлардан ташқари бошқа маълумотларни талаб қилиб олиш;

Ягона акциядор қонун ҳужжатларига ва ушбу Уставга мувофиқ бошқа ҳуқуқларга ҳам эга бўлади.

Ягона акциядор банк Кузатув кенгаши йиғилишини чақиришни талаб қилиш, кун тартибига таклифлар киритиш, фойдани тақсимлаш, бошқарув ва назорат органлари аъзолигига лавозимларни ўзгартириш ҳуқуқига эгадир.

44. Ягона акциядор қуйидагиларга мажбур:

ўз акцияларига бўлган ҳуқуқларини ҳисобга олиш бўйича хизмат кўрсатувчи депозитарийни ўзига оид маълумотлардаги ўзгаришлар ҳақида ўз вақтида хабардор қилиш;

банк акцияларини сотиб олишда Ўзбекистон Республикаси қонунчилиги талабларига риоя этиш;

банк сири ва махфий маълумотларни ташкил этувчи ахборотни ошкор этмаслик;

Ўзбекистон Республикасининг амалдаги қонун ҳужжатлари ва ушбу Уставда кўзда тутилган бошқа мажбуриятларни бажариш.

VII. БАНК АКЦИЯЛАРИГА ЭГАЛИК ҚИЛИШГА ДОИР РУХСАТНОМА ВА ЧЕКЛОВ

45. Жисмоний ва юридик шахслар ёки биргаликда ҳаракат қилувчи шахслар, шу жумладан норезидентлар бир ёки бир неча битим натижасида банкнинг устав капиталидаги:

беш ва ундан кўпроқ фоизни, лекин кўпи билан йигирма фоизни;

йигирма ва ундан кўпроқ фоизни, лекин кўпи билан эллик фоизни;

эллик ва ундан кўпроқ фоизни ташкил этадиган улушни бевосита ёки билвосита олишдан олдин Марказий банкнинг дастлабки рухсатномасини олиши шарт.

46. Ушбу Уставнинг 44-бандида белгиланган банк устав капиталидаги улушлар Марказий банкнинг дастлабки рухсатномасини олган шахслар томонидан ўзгартирилган тақдирда, қонунчиликда ўрнатилган тартибда хабардор қилиш йўли билан амалга оширилади.

47. Банк бошқа банкнинг акцияларини бевосита ёки билвосита олишдан олдин Марказий банкнинг дастлабки рухсатномасини олиши шарт. Банк бошқа банкнинг устав капиталидаги улушини кўпайтириш учун Марказий банкнинг тақрорий дастлабки рухсатномасини олиши шарт.

48. Имтиёзли солиқ режимини тақдим этувчи ва (ёки) охириги бенефициар мулкдорнинг шахсини ошкор этишни ҳамда молиявий операцияларни ўтказишда ахборот тақдим этишни назарда тутмайдиган давлатда ва худудда яшайдиган норезидент бўлган жисмоний шахслар ҳамда шундай давлатда рўйхатга олинган юридик шахслар, акциядорлар (иштирокчилар), охириги бенефициар мулкдорлар банк акцияларининг бевосита ёки билвосита эгалик қилувчилари бўлиши мумкин эмас.

49. Агар банкнинг акцияларини олишга доир дастлабки рухсатномани олиш учун монополияга қарши органнинг олдиндан розилигини олиш талаб этилса, банк акцияларини олишга доир дастлабки рухсатномани олиш учун берилган ариза Марказий банк томонидан монополияга қарши органнинг қарорини ҳисобга олган ҳолда кўриб чиқилади.

50. Банк акцияларини олишга доир дастлабки рухсатномасиз тузилган банк акцияларини олишга оид битимлар ҳақиқий эмас деб ҳисобланади.

51. Шахс ўзига боғлиқ бўлмаган ҳолатларда банкнинг акцияларини ушбу Уставнинг 44-бандида кўрсатилган ҳажмда олганда Марказий банк рухсатномасини олиш талаб қилинади. Шахс ўзига боғлиқ бўлмаган ҳолатларда банкнинг акцияларини олган кундан эътиборан Марказий банк томонидан тегишли қарор қабул қилинадиган кунга қадар акциялар эгасининг ҳуқуқлари тўхтатиб турилади.

52. Акциядор ўзига боғлиқ бўлмаган ҳолатларда банк акцияларини олган кундан эътиборан олтмиш кун ичида Марказий банкнинг рухсатномасини олиш учун ариза тақдим этиши керак. Акциядор томонидан ариза тақдим этилмаган тақдирда, ўзига боғлиқ бўлмаган ҳолатларда олинган банк акциялари олинган кундан эътиборан уч ой ичида бошқа шахсга берилиши лозим.

VIII. БАНКНИНГ ФОЙДАСИ, ФОНДЛАРИ, ЗАРАРЛАРИ ВА ДИВИДЕНДЛАР

53. Дивиденд банк соф фойдасининг Ягона акциядор томонидан тақсимланадиган қисмидир.

Дивиденд Ягона акциядор қарорига кўра пул маблағлари ёки бошқа қонуний тўлов воситалари ёхуд банкнинг қимматли қоғозлари билан тўланиши мумкин.

Банкнинг имтиёзли акциялари бўйича дивидендларни банкнинг қимматли қоғозлари билан тўлашга йўл кўйилмайди.

54. Банк молиявий йилнинг биринчи чораги, ярим йиллиги, тўққиз ойи натижаларига кўра ва (ёки) молиявий йил натижаларига кўра жойлаштирилган акциялар бўйича дивидендлар тўлаш тўғрисида қарор қабул қилишга ҳақлидир.

Молиявий йилнинг биринчи чораги, ярим йиллиги ва тўққиз ойи натижаларига кўра дивидендлар тўлаш тўғрисидаги қарор тегишли давр тугаганидан сўнг уч ой ичида қабул қилиниши мумкин.

Акцияларнинг ҳар бир тури бўйича дивидендлар тўлаш, дивиденднинг миқдори, уни тўлаш шакли ва тартиби тўғрисидаги қарор банк Кузатув кенгашининг тавсияси, молиявий ҳисоботнинг ишончлилиги ҳақида аудиторлик хулосаси мавжуд бўлган тақдирда, молиявий ҳисобот маълумотлари асосида эҳтимолий йўқотишларни қоплаш резервлари шакллантирилгандан ҳамда Ўзбекистон Республикаси Марказий банки талабларига мувофиқ тузатишлар амалга оширилгандан сўнг, Ягона акциядор томонидан қабул қилинган қарорга асосан тўланиши мумкин.

Дивидендларнинг миқдори банк Кузатув кенгаши томонидан тавсия этилган миқдордан кўп бўлиши мумкин эмас.

55. Банк акцияларнинг ҳар бир тури бўйича эълон қилинган дивидендларни тўлаши шарт.

Дивидендлар банк тасарруфида қоладиган соф фойдадан ва (ёки) ўтган йилларнинг тақсимланмаган фойдасидан тўланади.

Дивидендлар тўлаш тўғрисидаги қарорда дивидендлар тўлаш бошланадиган ва тугалланадиган саналар кўрсатилган бўлиши лозим.

Дивидендларни тўлаш муддати шундай қарор қабул қилинган кундан эътиборан 60 кундан кеч бўлмаслиги лозим.

56. Дивидендларни тўлаш тўғрисида қарор қабул қилинган Ягона акциядорнинг қарорини қабул қилиш учун шакллантирилган банк акциядорларининг реестрида қайд этилган шахслар акциялар бўйича дивиденд олиш ҳуқуқига эга.

Банк акциядорларининг реестри, Ягона акциядор қарор қабул қилган санадан 3 (уч) иш куни олдин шакллантирилади.

57. Банк дивидендларнинг миқдорини улардан ундириладиган солиқларни инобатга олмаган ҳолда эълон қилади. Банк тўланадиган дивидендлар миқдори тўғрисидаги маълумотларни қимматли қоғозлар бозорини тартибга солиш бўйича ваколатли давлат органининг ва банкнинг расмий веб-сайтларида қонун ҳужжатларида белгиланган муддатларда эълон қилади.

58. Банк Ягона акциядорга дивидендлар тўлаш, шунингдек банкнинг Кузатув кенгаши, Бошқаруви аъзолари ва ходимларини мукофотлаш орқали фойдани тақсимлашни қуйидаги ҳолларда амалга оширишга ҳақли эмас:

пруденциал нормативлар Марказий банк томонидан белгиланган талабларга мувофиқ бўлмаганда ёки улар мазкур тақсимлаш оқибатида бузилганда;

ночорлик (банкротлик) бўлганда ёки мазкур тақсимлаш оқибатида ночорликнинг (банкротликнинг) аломатлари юзага келганда;

Марказий банкнинг ижро этилиши мажбурий бўлган кўрсатмасида акс этирилган, шу жумладан ахборотни ошқор этиш борасида кўрсатилган камчиликлар бартараф этилмаганда ёки уларни бартараф этиш имконияти мавжуд бўлмаганда;

Марказий банкнинг фойдани тақсимламаслик тўғрисида банкка нисбатан талаби мавжуд бўлганда.

59. Банк қуйидаги ҳолларда фойдани тақсимлаш учун Марказий банкнинг розилигини олиши керак:

ушбу Уставнинг 57-бандининг биринчи хатбошисида кўрсатилган тўловларнинг умумий суммаси банкнинг ўз капиталининг ўн фоизидан ортганда;

жорий ёки ўтган чоракда ва (ёки) молия йилида зарар мавжуд бўлганда.

60. Банк ўзининг хўжалик фаолияти натижасида оладиган фойдаси бюджет билан ҳисоб-китоб қилиш ва фондларни ташкил қилиш учун ишлатилади.

61. Банк фондлари банк Кузатув кенгашининг қарорига мувофиқ шакллантирилади ва банкнинг тўлиқ тасарруфида бўлади.

62. Банкнинг захира фонди банк устав капиталининг 15 фоизи миқдорини ташкил этади. Банкнинг захира фонди ушбу Уставада белгиланган миқдорга етгунига қадар банк соф фойдасининг беш фоизи миқдорида ҳар йилги мажбурий ажратмалар орқали шакллантирилади.

63. Бошқа маблағлар мавжуд бўлмаган тақдирда банкнинг захира фонди банк зарарлари ўрнини қоплаш, банк корпоратив облигацияларини муомаладан чиқариш, имтиёзли акциялар бўйича дивидендлар ва банк акцияларини қайтариб сотиб олиш учун мўлжалланади.

64. Банкнинг зарарлари захира фонди ҳисобидан қопланади. Зарарларни қоплаш учун захира фондининг маблағлари етишмаган тақдирда, зарарни қоплаш манбалари тўғрисидаги қарор банк Кузатув кенгаши томонидан қабул қилинади.

65. Банкнинг соф фойдаси ушбу Уставга ва Ягона акциядор қарорига мувофиқ тақсимланади.

IX. БАНКНИ БОШҚАРИШ

66. Куйидагилар Банкнинг бошқарув органлари ҳисобланади:

Ягона акциядор;

Банк Кузатув кенгаши;

Банк Бошқаруви.

Банк корпоратив бошқарувга оид сиёсатни ишлаб чиқади ва тасдиқлайди.

Банк Кузатув кенгашининг ва Бошқарувининг ваколатлари ижро этиш учун учинчи шахсларга ўтказилиши мумкин эмас, бундан мазкур Уставда назарда тутилган ҳоллар мустасно.

67. Кузатув кенгаши ва Бошқарув банк Устави, Ягона акциядор қарорлари ва Ўзбекистон Республикасининг амалдаги қонун ҳужжатларида берилган ваколатлар доирасида банк фаолиятига раҳбарлик қилади.

Банк фаолиятини самарали ташкил этиш ва хорижий инвесторларни устав капиталига жалб қилиш, бошқарув органлари ва меҳнат жамоаси ўртасида ўзаро алоқалар тизимини яратиш банк корпоратив бошқарув кодексига ва банкнинг бошқа ички ҳужжатларига асосан амалга оширилади.

68. Банк Кузатув кенгашининг ва Бошқарувининг аъзолари, шунингдек муҳим аҳамиятга эга ходимлари бенуқсон ишчанлик обрўсига, банк таваккалчиликларининг самарали бошқарилишини, ўз ваколатлари доирасида асосли қарорлар қабул қилинишини таъминлаш учун зарур бўлган тажрибага, билим ва кўникмаларга эга бўлиши керак, банклар ва банк фаолияти тўғрисидаги қонун ҳужжатлари талабларига доимо мувофиқ бўлишини таъминлаши шарт.

69. Банк Бошқаруви аъзолари ва муҳим аҳамиятга эга ходимлари иш берувчининг розилиги билан бошқа ташкилотларда ўриндошлик асосида ишлаши мумкин, бундан уларнинг бошқа банклар ва ташкилотларда ишга жойлашуви манфаатлар тўқнашувига олиб келиши мумкин бўлган ҳоллар мустасно.

70. Банк Кузатув кенгашининг ва Бошқарувининг аъзоларини, шунингдек муҳим аҳамиятга эга ходимлар лавозимларига кўрсатилаётган номзодларни уларнинг лавозимга киришишидан олдин Марказий банк билан келишиб олади. Баҳолаш шартлари, баҳолаш учун зарур ҳужжатлар, малака талабларига мувофиқлик мезонлари, шунингдек уларни келишиб олиш тартиби Марказий банк томонидан белгиланади.

Ягона акциядор

71. Ягона акциядор банкнинг юқори бошқарув органидир.

72. Ягона акциядорнинг ваколат доирасига куйидагилар киради:

71.1 мазкур Уставга ўзгартириш ва қўшимчалар киритиш ёки Банкнинг янги таҳрирдаги уставини тасдиқлаш;

71.2 банкни қайта ташкил этиш;

71.3 тугатиш, тугатувчини (тугатиш комиссиясини) тайинлаш ҳамда оралик ва якуний тугатиш балансларини тасдиқлаш;

71.4 Банк Кузатув кенгашининг сон таркибини белгилаш, уларнинг аъзоларини сайлаш (тайинлаш) ва аъзоларнинг ваколатларини муддатидан илгари тугатиш;

71.5 эълон қилинган акцияларнинг энг кўп миқдорини белгилаш;

71.6 банкнинг устав капиталини камайтириш;

71.7 қонун ҳужжатларида белгиланган тартибда Марказий банкнинг розилиги билан банк томонидан ўз акцияларини сотиб олиш;

71.8 банкнинг ташкилий тузилмасини тасдиқлаш;

71.9 аудиторлик текширувини ўтказиш учун аудиторлик ташкилотини белгилаш ушбу ташкилотнинг хизматларига тўланадиган энг кўп ҳақ миқдори ва у билан шартнома тузиш (шартномани бекор қилиш) тўғрисида қарор қабул қилиш;

71.10 Банк Кузатув кенгаши ва Банк Бошқаруви аъзоларини мукофотлаш тартиби тўғрисида низомларни ва қонун ҳужжатларига асосан ягона акциядор мутлақ ваколатига кирувчи банкнинг ички ҳужжатларини, шунингдек уларга киритиладиган қўшимча ва ўзгартиришларни тасдиқлаш;

71.11 банкнинг йиллик ҳисоботини, шунингдек, банк фаолиятининг асосий йўналишлари ва мақсадидан келиб чиққан ҳолда банкни ўрта муддатга ва узоқ муддатга ривожлантиришнинг аниқ муддатлари белгиланган стратегиясини тасдиқлаш;

71.12 қонун ҳужжатлари талаблари ва чекловларини ҳисобга олган ҳолда банк фойдаси ва зарарларини тақсимлаш;

71.13 банк Кузатув кенгашининг ўз ваколат доирасига кирадиган масалалар юзасидан, шу жумладан жамиятни бошқаришга доир қонун ҳужжатларида белгиланган талабларга риоя этилиши юзасидан ҳисоботларини эшитиш;

71.14 банк томонидан корпоратив облигациялар, шу жумладан акцияларга айирбошланадиган облигациялар чиқариш тўғрисида қарор қабул қилиш;

71.15 қимматли қоғозларнинг ҳосилаларини чиқариш тўғрисида қарор қабул қилиш;

71.16 қонун ҳужжатларида назарда тутилган ҳолларда, аффилиланган шахслар билан битим тузиш тўғрисида қарор қабул қилиш;

71.17 акцияларни майдалаш ва йириклаштириш;

71.18 бошқа шахсга берилаётган мол-мулкнинг ёки олинаётган мол-мулкнинг баланс қиймати бундай битимларни тузиш тўғрисидаги қарор қабул қилинаётган санада банк соф активлари миқдорининг эллик фоизидан ортиқ бўлган мол-мулкни банк томонидан олиш ёки уни бошқа шахсга бериш эҳтимоли билан боғлиқ йирик битим тузиш, шунингдек қонун ҳужжатлари ва мазкур Уставга асосан Ягона акциядор томонидан қарор қабул қилиниши мумкин бўлган йирик битимлар бўйича қарор қабул қилиш, Банкнинг кундалик хўжалик фаолиятини юритиш жараёнида тузиладиган битимлар ҳамда акцияларни ва бошқа қимматли қоғозларни жойлаштириш билан боғлиқ бўлган битимлар бундан мустасно;

71.19 Банк Кузатув кенгаши ва Банк Бошқарувининг банкни ривожлантириш стратегиясига эришиш бўйича кўриладиган чора-тадбирлар тўғрисидаги ҳисоботларини

кўриб чиқиш;

71.20 Банк Кузатув кенгаши томонидан қарорлар қабул қилиниши мумкин бўлган банк томонидан хайрия, текин ва ҳомийлик ёрдами кўрсатиш чегараларини ўрнатиш бўйича қарорлар қабул қилиш;

71.21 қонун ҳужжатлари, мазкур Устав, ягона акциядорнинг қарори ва банкнинг бошқа ички ҳужжатлари билан Ягона акциядорнинг ваколатларига киритилган бошқа масалаларни ҳал қилиш.

73. Ягона акциядор муҳокамасига масалалар қонунчиликда белгиланган тартиб бўйича Банк Кузатув кенгашининг ташаббусига кўра, банк Бошқаруви аъзолари, Ички аудит хизмати бошлиғи, банкнинг ташқи аудит талабига кўра киритилади.

Ягона акциядор ҳар бир молия йили якуни бўйича камида бир марта, молия йили тугагандан кейин олти ойдан кечиктирмасдан банк фаолиятига оид асосий масалалар бўйича қарор қабул қилиши керак.

Кузатув кенгаши

74. Банкнинг Кузатув кенгаши банк фаолиятига умумий раҳбарликни амалга оширади, бошқарувга оид қарорлар қабул қилиш жараёнида назорат ва текширув вазифасини бажаради ҳамда умуман банкнинг фаолияти ва молиявий барқарорлиги учун жавобгардир.

75. Кузатув кенгаши банкни самарали ва тадбирли бошқаришни, шу жумладан банк бошқаруви аъзолари ўртасида ваколатларнинг ҳамда жавобгарликнинг тақсимланишини, манфаатлар тўқнашувининг олди олинишини ва бартараф этилишини таъминлайдиган бошқарув ташкилий тузилмасини белгилайди ҳамда унинг жорий этилиши устидан назорат ва текширувни амалга оширади.

76. Кузатув кенгаши аъзолари банкнинг оқилона корпоратив бошқарувига кўмаклашиши ҳамда ўз ваколатларини ва мажбуриятларини бажариш чоғида банкнинг, унинг омонатчилари ва Ягона акциядорининг қонуний манфаатларини инобатга олиши, шунингдек Марказий банк билан самарали ҳамкорликни таъминлаши керак.

77. Кузатув кенгаши банк Ягона акциядорининг ҳуқуқ ва манфаатларини ҳимоя қилади ва банк фаолиятига умумий раҳбарликни амалга оширади, Ўзбекистон Республикасининг қонун ҳужжатлари ва ушбу Устав билан Ягона акциядор ваколат доирасига киритилган масалаларни ҳал этиш бундан мустасно.

78. Кузатув кенгашининг ваколат доирасига қуйидагилар қиради:

78.1. банкни стратегик бошқаришда Ягона акциядор ролини ошириш, халқаро тажриба асосида замонавий корпоратив бошқарув услубларини жорий этиш, инвестиция, моддий-техник, молиявий ва меҳнат ресурсларидан фойдаланиш самарадорлигини ошириш асосида банк фаолиятининг устувор йўналишларини белгилаш;

78.2. банкни қайта ташкил қилиш ва тугатиш, банк Уставига ўзгартиришлар ва қўшимчалар киритиш ёки янги таҳрирдаги банк Уставини тасдиқлаш, банкнинг йиллик ҳисоботи, фойда ва зарарлари тақсимланишини тасдиқлаш, аудиторлик текшируви ўтказиш (мажбурий аудиторлик текширувини ўтказиш учун аудиторлик ташкилотини ва унинг хизматига тўланадиган ҳақ миқдори чегарасини белгилаш ва у билан шартнома тузиш ёки шартномани бекор қилиш бундан мустасно), тўғрисидаги масалаларни кўриб чиқиш учун Ягона акциядор муҳокамасига киритиш;

78.3. мол-мулкнинг бозор қийматини белгилашни ташкил этиш;

78.4. банкнинг сиёсатлари ва йиллик бизнес-режасини тасдиқлаш, бунда

- банкнинг келгуси йилга мўлжалланган бизнес-режаси банкнинг Кузатув кенгаши мажлисида жорий йилнинг 1 декабридан кечиктирмай тасдиқланиши лозим;
- 78.5. банк Бошқаруви раисини лавозимига тайинлаш, унинг ваколат муддатини узайтириш ёки муддатидан олдин тугатиш ва кейинчалик бу масалани тасдиқлаш учун Ягона акциядор муҳокамасига киритиш.
- 78.6. Қонунчиликда ва банк ички ҳужжатларида белгиланган тартибда, банк Бошқаруви раисини тайинлаш тўғрисидаги қарор хорижий менежерлар ҳам иштирок этиши мумкин бўлган танлов асосида қабул қилиниши мумкин;
- 78.7. банк Бошқаруви аъзоларини лавозимига сайлаш (тайинлаш) ва уларнинг ваколатларини муддатидан олдин тугатиш;
- 78.8. фақатгина банк Кузатув кенгаши аъзоларидан иборат бўлган аудит қўмитасини, ички аудит хизматини ташкил этиш ва унинг ходимларини тайинлаш, шунингдек ҳар чоракда унинг ҳисоботларини эшитиб бориш;
- 78.9. Ахборот технологиялари қўмитасини (IT-қўмитаси) ва банк хатарларини назорат қилиш қўмитасини ташкил этиш;
- 78.10. дивиденд миқдори, уни тўлаш шакли ва тартиби юзасидан тавсиялар бериш;
- 78.11. банкнинг захира фондидан ва бошқа фондларидан фойдаланиш;
- 78.12. банкнинг филиалларини ташкил қилиш ва ваколатхоналарини очиш;
- 78.13. шўъба ва тобе хўжалик жамиятларини ташкил этиш, қайта ташкил этиш ва тугатиш;
- 78.14. баланс қиймати ёки олиш қиймати битим тузиш тўғрисида қарор қабул қилинаётган санада банк соф активлари миқдорининг ўн беш фоизидан эллик фоизигачасини ташкил этувчи мол-мулкни сотиб олиш ёки сотиш хусусида йирик битим тузиш тўғрисидаги бир овоздан қарор қабул қилиш, Банкнинг кундалик хўжалик фаолиятини юритиш жараёнида тузиладиган битимлар ҳамда акцияларни ва бошқа қимматли қоғозларни жойлаштириш билан боғлиқ бўлган битимлар бундан мустасно. Агарда йирик битим тузиш тўғрисида Кузатув кенгаши томонидан бир овоздан қарор қабул қилишга эришилмаса, Кузатув кенгашининг қарори билан йирик битим тузиш тўғрисидаги масала Ягона акциядор муҳокамасига қарор қабул қилиш учун киритилиши мумкин;
- 78.15. банкнинг тижорат ва нотижорат ташкилотлардаги иштироки билан боғлиқ битимларни қонун ҳужжатларида белгиланган тартибда тузиш;
- 78.16. банк корпоратив облигацияларини қайтариб сотиб олиш тўғрисида қарор қабул қилиш;
- 78.17. банк билан алоқадор бўлган (аффилиланган) шахслар билан битим тузиш тўғрисида қарорларни қабул қилиш, бундай битим тузиш тўғрисидаги қарор қонун ҳужжатлари ва ушбу Уставга мувофиқ Ягона акциядор ваколат доирасига киритилган ҳоллар бундан мустасно;
- 78.18. банк томонидан корпоратив облигациялар, жамғарма ва депозит сертификатларини чиқариш тўғрисида қарор қабул қилиш;
- 78.19. акцияларни жойлаштириш (қимматли қоғозларнинг биржа бозорига ва уюшган биржадан ташқари бозорига чиқариш) нархини қонун ҳужжатлари ва ушбу Уставга мувофиқ белгилаш;
- 78.20. банк Бошқаруви аъзоларига тўланадиган ҳақ ва (ёки) компенсацияларнинг миқдорларини белгилаш;
- 78.21. банкнинг таркибий тузилмалари ва филиаллари фаолият тартибини белгиловчи ички ҳужжатларни тасдиқлаш, қонун ҳужжатлари ва ушбу Уставга мувофиқ Ягона акциядорга ва банк Бошқаруви ваколатига тааллуқли бўлган ички ҳужжатларни қабул қилиш (тасдиқлаш) бундан мустасно;
- 78.22. Банк Бошқаруви фаолиятига дахлдор ҳар қандай ҳужжатдан эркин фойдаланиш ва Банк Бошқаруви ёки унинг топшириғи бўйича масъул шахслардан Кузатув кенгаши зиммасига юклатилган вазифаларни бажариш учун уларни олиш.

Кузатув кенгаши аъзолари олинган ҳужжатлардан фақат хизмат мақсадларида фойдаланиши мумкин;

78.23. Кузатув кенгаши қошидаги қўмиталарини ташкил қилиш ва улар тўғрисидаги низомлар, шунингдек ички аудит ва ички назорат хизмати низомларини тасдиқлаш;

78.24. Ягона акциядорга ошкор этган ҳолда, Ягона акциядор белгилаган ва жорий йил учун тасдиқланган бизнес-режа доирасида, хайр-эҳсон, ҳомийлик ва беғараз ёрдам кўрсатиш шартлари тўғрисидаги қарорларни қабул қилиш. Бундай ҳолатда хайр-эҳсон, ҳомийлик ёки беғараз ёрдам миқдорининг чегараси ҳар йили Ягона акциядор томонидан белгиланади;

78.25. банкда вужудга келадиган ўзаро қарашлар келишмовчиликлари (банк ва (ёки) мижоз учун келгусида нохуш ҳолатга олиб келиши мумкин бўлган банкнинг мулкӣ ва бошқа манфаатларида банк таркибий тузилмалари, унинг ходимлари, мижозлари ўртасидаги келишмовчиликлар)ни олдини олиш ва тартибга солиш;

78.26. учинчи шахслар томонидан банк фаолияти тўғрисидаги эксперт ҳисоботларини банк веб сайти ёки “Интернет” ахборот телекоммуникацион тармоғида жойлаштириш учун бирламчи розиликни бериш;

78.27. қонун ҳужжатлари, ушбу Устав ва Кузатув кенгаши тўғрисидаги низом ва банкнинг бошқа ички ҳужжатларида кўзда тутилган Кузатув кенгаши ваколатларига киритилган бошқа масалаларни ҳал қилиш.

Кузатув кенгаши ваколатларига киритилган масалаларни ҳал қилиш банк Бошқарувиға ўтказилиши мумкин эмас.

79. Кузатув кенгаши мажбуриятлари:

ўз ваколатларидан банк Ягона акциядори манфаатларини кўзлаб иш тутиш;

банкка малакали раҳбарликни таъминлаш;

банк Бошқаруви билан маслаҳатлашган ҳолда банкнинг узоқ ва қисқа муддатли бизнес-режаларини тасдиқлаш;

банкнинг амалиёт фаолияти, кредитлар бериш ва маблағларни инвестициялашнинг тўғрилиги устидан (омонатчилар, кредиторлар ва Ягона акциядор манфаатларини ҳимоя қилиш мақсадида) жорий назоратни амалга ошириш;

стратегик мақсадларни, корпоратив бошқарув сиёсатини, банкнинг бошқа ички сиёсатларини, шу жумладан таваккалчиликларни аниқлаш, бошқариш, мониторинг қилиш ва улар тўғрисида хабардор этиш, капиталнинг етарлилигини лозим даражада сақлаб туриш сиёсатини тасдиқлаш ҳамда уларнинг амалга оширилиши устидан назорат қилиш;

активларни таснифлаш асосида активлар бўйича эҳтимолдаги зарарларга қарши яратиладиган захиралар шакллантирилиши устидан назорат қилиш, шунингдек банкнинг капитал ва умумий захираларининг етарли даражада сақлаб турилишини таъминлаш;

манфаатлар тўқнашувининг олдини олиш ва уни бартараф этиш тартибини тасдиқлаш;

банкнинг молиявий ҳолатини тиклаш режаларини тасдиқлаш;

банкнинг Бошқаруви устидан назоратни амалга ошириш;

банкнинг қабул қилинган бизнес-режаси бажарилиши устидан назорат қилиш, шунингдек ҳар чоракда банкнинг фаолияти натижалари тўғрисида банк Бошқарувининг ҳисоботини эшитиш;

банкнинг ички аудит хизмати фаолиятини ташкил этиш, шунингдек банк ички аудит хизматининг чораклик ҳисоботлари асосида банк Бошқаруви томонидан банк стратегиялари ва сиёсатларига риоя этилишини баҳолашдан ўтказиш;

Банк Бошқаруви аъзолари томонидан тақдим этилган ахборотни, таклифларни ва тушунтиришларни ўрганиш, муҳокама қилиш ҳамда улар бўйича баҳслашиш;

банк фаолиятини бошқариш тизими самарадорлигини, шу жумладан банк

бошқаруви принциплари мониторингини ва уларни даврий баҳолашни амалга ошириш ҳамда аниқланган камчиликларни бартараф этиш учун тегишли чораларни кўриш;

бир йилда камида бир марта амалга оширилган назорат ва текширув фаолияти тўғрисида Ягона акциядорга ҳисобот тақдим этиш;

йиллик молиявий ҳисоботларни тасдиқлаш ҳамда бухгалтерия ҳисоби ва молиявий ҳисоботлар тизимининг яхлитлигини таъминлаш;

банкнинг узоқ муддатли молиявий манфаатларини ва Марказий банк томонидан капиталга нисбатан белгиланган талабларни ҳисобга олган ҳолда пруденциал талабларга риоя этилишини таъминлаш;

банкнинг Ички назорат тўғрисидаги низоми талабларига риоя қилинишини назорат қилиш.

80. Кузатув кенгаши камида 5 (беш) кишидан иборат таркибда сайланади. Кузатув кенгаши аъзоларининг учдан икки қисми банкка алоқадор шахслар бўлмаслиги керак, бундан уларнинг Кузатув кенгашидаги аъзолиги мустасно. Кузатув кенгаши аъзолари Ягона акциядор томонидан уч йил муддатга сайланади. Кузатув кенгаши таркибига сайланган шахслар чекланмаган тарзда қайта сайланиши мумкин.

Банк Бошқаруви аъзолари ва Бошқарув раиси, шунингдек банкда меҳнат шартномаси асосида ишлаётган шахслар Кузатув кенгаши аъзоси булиши мумкин эмас. Кузатув кенгаши аъзоларининг кўпчилиги банкка алоқадор шахслар бўлмаслиги керак, бундан уларнинг Кузатув кенгашидаги аъзолиги мустасно.

Ягона акциядордан ташқари олимлар ва банк соҳаси мутахассислари ҳам Кузатув кенгаши аъзоси бўлишлари мумкин.

Кузатув кенгаши аъзолари ўз мулоҳазаларининг мустақиллиги бўйича талабларга риоя этиши керак.

Қуйидаги ҳолларда шахс Кузатув кенгаши аъзолигига сайланиши мумкин эмас ёки сайланган шахс Кузатув кенгаши аъзолиги ҳуқуқидан маҳрум этилади, агар:

шахс икки ёки ундан ортиқ банкнинг кузатув кенгаши аъзоси бўлса ёки аъзо бўлиш ниятида бўлса, бундан мазкур банклар бир банк гуруҳига тегишли бўлган ҳоллар мустасно;

шахснинг ваколатлари Марказий банк талабига кўра муддатидан илгари тугатилган бўлса.

Кузатув кенгаши таркибида, ҳар йили қайта сайланиши мумкин бўлган биттадан кам бўлмаган мустақил аъзоси бўлиши керак.

Қуйидаги шахслар, яъни:

охирги уч йил ичида банкда ва (ёки) банкга аффилиланган шахсларда ишламаган; банкнинг акциядори ва (ёки) банкга аффилиланган шахсни таъсисчиси (акциядори, иштирокчиси) бўлмаган;

банкнинг йирик мижози ва (ёки) банкнинг йирик етказиб берувчиси ва (ёки) банкга аффилиланган шахс билан фуқаровий-ҳуқуқий муносабатда бўлмаган (бунда энг кам ойлик иш ҳақининг икки минг баробари миқдорида бўлган амалдаги шартномаси бўлган шахслар йирик мижоз ва йирик етказиб берувчи деб ҳисобланади);

Кузатув кенгаши аъзоси вазифаси ва функцияларини бажариш билан боғлиқ бўлган шартномалардан ташқари, банк ва (ёки) банкга аффилиланган шахслар билан бирон-бир келишувга эга бўлмаган;

охирги уч йил ичида ёки амалда банкнинг ёки банкга аффилиланган шахсларнинг бошқарув ва ички назорат органларининг аъзоси бўлган шахснинг турмуш ўртоғи, ота-онаси (фарзандликка олувчиси), қондош (тутинган) фарзанди, қондош ёки тутинган акаси- укаси, опаси-синглиси бўлмаган;

давлат бошқаруви ёки давлат корхонаси ходими бўлмаган шахслар Кузатув кенгашининг мустақил аъзоси деб эътироф этилади.

81. Кузатов кенгаши аъзолари сайлови кумулятив овоз бериш орқали амалга оширилади.

Кумулятив овоз беришда ҳар бир акциядорга тегишли овозлар сони Кузатов кенгашига сайланиши лозим бўлган шахслар сонига кўпайтирилади ва акциядор шу тариха олинган овозларни битта номзодга тўлиқ беришга ёки уларни икки ва ундан ортиқ номзодлар ўртасида тақсимлашга ҳақли.

Энг кўп овоз тўплаган номзодлар Кузатов кенгашининг таркибига сайланган деб ҳисобланади.

82. Кузатов кенгашининг раиси Кузатов кенгаши аъзоларининг умумий сонига нисбатан кўпчилик овоз билан Кузатов кенгаши таркибидан Кузатов кенгаши аъзолари томонидан сайланади.

83. Кузатов кенгашининг раиси унинг ишини ташкил этади, Кузатов кенгаши мажлисларини чақиради ва уларда раислик қилади, мажлисларида баённома юритилишини ташкил этади, банк номидан Бошқарув раисини ёллаш тўғрисидаги меҳнат шартномасини тузади.

Кузатов кенгашининг раиси бўлмаган тақдирда унинг вазифасини Кузатов кенгашининг аъзоларидан бири амалга оширади.

84. Кузатов кенгашининг йиғилиши Кузатов кенгашининг раиси томонидан унинг ўз ташаббусига кўра, Кузатов кенгаши аъзосининг, банк Бошқаруви аъзосининг, Ягона акциядорининг талабига, ички аудит хизмати раҳбари, ташқи аудиторининг талабига кўра, шунингдек қонунчиликда кўрсатилган бошқа шахслар талабига кўра чақирилади.

85. Кузатов кенгаши йиғилиши ҳар чоракда камида бир марта чақирилади.

86. Кузатов кенгашининг йиғилишини ўтказиш учун кворум Кузатов кенгашига сайланган аъзоларнинг 80 фоизидан кам бўлмаслиги керак.

Кузатов кенгаши аъзоларининг сони ушбу Уставда кўзда тутилган миқдорнинг 80 фоизидан кам бўлган тақдирда, Ягона акциядор Банк Кузатов кенгашининг янги таркибини сайлаш учун қарор қабул қилиши шарт. Кузатов кенгашининг қолган аъзолари банк Бошқаруви раиснинг ваколатлари муддатидан илгари тугатилган тақдирда, унинг вазифасини вақтинча бажарувчини тайинлашга ҳақлидир.

87. Кузатов кенгашининг йиғилишда қарорлар йиғилишда ҳозир бўлганларнинг кўпчилик овози билан қабул қилинади, Уставнинг 78.3, 78.10, 78.11, 78.12, 78.14, 78.15, 78.16, 78.17 ва 78.18 бандларидаги масалалар юзасидан қарор қабул қилиш ҳоллари бундан мустасно, бу масалалар юзасидан қарорлар Кузатов кенгаши томонидан бир овоздан қабул қилиниши керак. Агарда кўрсатилган масалалар юзасидан Кузатов кенгаши томонидан бир овоздан қарор қабул қилиш имкони бўлмаса, Кузатов кенгаши ушбу масалаларни Ягона акциядорнинг муҳокамасига киритади.

Кузатов кенгаши қарорларини қабул қилишда овозлар тенг бўлган тақдирда Кузатов кенгаши раиси ҳал қилувчи овоз ҳуқуқига эга бўлади.

Кузатов кенгашининг бир аъзоси ўз овозини Кузатов кенгашининг бошқа аъзосига беришига йўл қўйилмайди.

88. Кузатов кенгашининг йиғилишида баённома юритилади, у йиғилиш ўтказилганидан сўнг 10 (ўн) кундан кечиктирмай тузилади ва тасдиқланади.

Кузатов кенгаши йиғилишининг баённомаси йиғилишда иштирок этаётган, йиғилиш баённомаси тўғри расмийлаштирилиши учун жавобгар бўлган Кузатов кенгаши аъзолари томонидан имзоланади.

Кузатов кенгашининг қарорлари сиртдан овоз бериш йўли билан (сўров йўли билан) Кузатов кенгашининг барча аъзолари томонидан бир овоздан қабул қилиниши мумкин.

Кузатов кенгаши йиғилишининг баённомаси имзоланган куни банк Бошқарувига ижро этиш учун топширилади.

Банк Бошқаруви

89. Банк Бошқаруви банкни бошқаришнинг ижро этувчи органи бўлиб, у банкнинг Кузатов кенгаши томонидан тасдиқланган фаолият стратегияси ва уни бошқариш тизимига мувофиқ банкнинг фаолиятига оператив бошқарувни амалга оширади ҳамда банкнинг фаолияти учун жавобгарликни тўлиқ зиммасига олади. Бошқарувга раис раҳбарлик қилади.

Банк Бошқаруви қонун ҳужжатлари ва банк Уставига мувофиқ, Ягона акциядор ёки Кузатов кенгашининг ваколат доирасига киритилган масалалар бўйича қарорлар қабул қилишга ҳақли эмас.

Банк Бошқаруви Кузатов Кенгаши ва Ягона акциядори олдида ҳисобдордир.

90. Банк Бошқаруви камида 3 (уч) кишилик таркибдан иборатдир. Банк Бошқаруви таркибига раис, унинг ўринбосарлари, бош бухгалтер, банк юридик хизмати раҳбари, шунингдек банкнинг асосий бўлинмалари раҳбарлари киритилиши мумкин.

91. Банк Бошқаруви раиси ҳамда бошқарув аъзолари ўз лавозимига Кузатов кенгашининг қарори билан уч йил муддатга тайинланади. Банк Бошқаруви раиси ҳамда бошқарув аъзолари билан уч йиллик муддатга тузилган шартноманинг амал қилиш муддатини узайтириш ёки уни бекор қилиш мумкинлиги тўғрисида ҳар йили қарор қабул қилинади. Қонунчиликда ва банк ички ҳужжатларида белгиланган тартибда, банк Бошқаруви раисини тайинлаш тўғрисидаги қарор, юқори малакали хорижий менежерлар ҳам иштирок этиши мумкин бўлган танлов асосида қабул қилиниши мумкин.

Банк Бошқаруви аъзоси бўлган акциядор ёки унинг вакили, банк Бошқаруви аъзоларини сайлаш тўғрисидаги масала юзасидан овоз беришга ҳақли эмас.

Бошқарув раиси ва Бошқарув аъзолари билан шартнома банк номидан Кузатов кенгашининг раиси ёки Кузатов кенгаши ваколат берган шахси томонидан имзоланади.

92. Банк Бошқарувининг ваколатига банкнинг кундалик фаолиятига раҳбарлик қилишга доир барча масалалар киради, Ягона акциядор ёки Кузатов кенгашининг ваколат доирасига киритилган масалалар бундан мустано.

93. Банк Бошқаруви:

Ягона акциядор ва Кузатов кенгашининг қарорлари бажарилишини ташкил этади; банкнинг таркибий тузилмалари ишини мувофиқлаштиради, халқаро тажрибани чуқур таҳлил қилиш асосида замонавий корпоратив бошқарув услубларини жорий этади, инвестиция, моддий-техник, молиявий ва меҳнат ресурсларидан фойдаланиш самарадорлигини оширади; банкка хорижий инвестицияларни кенг жалб қилиш учун қулай шароитлар яратади, етакчи хорижий таълим муассасалари билан ҳамкорлик асосида бошқарув ходимларини тайёрлаш ва уларнинг касб даражасини оширишни ташкил қилади, шунингдек банкнинг раҳбарлик лавозимларига чет эллик юқори малакали менежерларни жалб қилади;

банк ички назорат ва ички аудит хизматлари тўғрисидаги низомлар ва Ягона акциядор ва Кузатов кенгаши томонидан тасдиқланадиган бошқа ички ҳужжатлардан ташқари банк таркибий бўлинмалари тўғрисидаги низом, тартиб, қоидаларни

тасдиқлайди;

баланс қиймати ёки олиш қиймати битим тузиш тўғрисида қарор қабул қилинаётган санада банк соф активлари миқдорининг беш фоизидан ўн беш фоизигачани ташкил этувчи мол-мулкни сотиб олиш ёки сотиш хусусида битим тузиш тўғрисида қарор қабул қилади;

Ўзбекистон Республикаси ҳудудида банк хизматлари марказларини ташкил қилади; банк Бошқаруви ҳузуридаги қўмиталарни ташкил этади ва улар тўғрисидаги низомларни тасдиқлайди;

банкнинг кундалик фаолиятидаги муҳим масалалар бўйича қарорлар қабул қилади;

банк ички аудити хизмати текширув натижалари бўйича аниқланган камчиликлар ва қонун бузилишларни ҳар чоракда кўриб чиқади ва уларни бартараф қилиш чораларини кўради;

ташқи аудит текшируви натижалари ва Марказий банк томонидан ўтказилган инспекция (текширув) ҳисоботларини батафсил таҳлил қилади;

банкни бошқариш учун сиёсатлар, жумладан кредит, инвестиция, эмиссия, банк ликвидлигини бошқариш сиёсатларини ишлаб чиқиш бўйича чораларни кўради;

қонун ҳужжатлари, ушбу Устав, банк Бошқаруви тўғрисидаги низом ва банкнинг бошқа ички ҳужжатларида назарда тутилган банк Бошқаруви ваколатига кирадиган бошқа масалаларни ҳал қилади.

94. Банк Бошқаруви:

стратегик мақсадларни, корпоратив бошқарув сиёсатини, банкнинг бошқа ички сиёсатларини, шу жумладан таваккалчиликларни аниқлаш, бошқариш, мониторинг қилиш ва таваккалчиликлар тўғрисида хабардор этиш, капиталнинг етарлилигини лозим даражада сақлаб туриш сиёсатини амалга ошириши;

банкнинг тегишли ва шаффоф ташкилий тузилмасини, шу жумладан ваколатларни ва жавобгарликни банк ходимлари ўртасида ўз ваколатлари доирасида тақсимлашни таъминлаши;

банк ходимларининг фаолияти устидан назоратни амалга ошириши;

банкнинг қабул қилинган йиллик бизнес-режасини бажариши, шунингдек банк Ягона акциядори ва кузатув кенгашига бажарилган ишлар, банкка нисбатан қўлланилган чоралар ҳамда санкциялар тўғрисидаги ҳисоботни даврий равишда тақдим этиши;

ушбу Уставида ҳамда банклар ва банк фаолияти тўғрисидаги қонун ҳужжатларида назарда тутилган бошқа мажбуриятларни бажариши шарт.

95. Банк Бошқаруви йиғилиши, агар унда банк Бошқарувининг камида 75 (етмиш беш) фоиз аъзоси ҳозир бўлса, ваколатли ҳисобланади.

Қарорлар банк Бошқаруви йиғилишида иштирок этувчиларнинг кўпчилик овози билан қабул қилинади. Овозлар тенг бўлган ҳолларда банк Бошқаруви раисининг овози ҳал қилувчи овоз ҳисобланади.

Банк Бошқаруви аъзоси банк Бошқаруви қарорига қўшилмаган ҳолларда Кузатув кенгашига ўз фикри тўғрисида хабар бериши мумкин.

96. Банк Бошқаруви йиғилишида баённома юритилади. Банк Бошқаруви йиғилишининг баённомаси Кузатув кенгаши талаби бўйича уларга тақдим қилинади.

Банк Бошқаруви йиғилишини ўтказилишини, банк номидан барча ҳужжатларга ва банк Бошқаруви йиғилиши баённомасига имзо чекувчи банк Бошқаруви раиси ташкил қилади, ўз ваколат доирасида банк Бошқаруви қабул қилган қарорларга мувофиқ банк номидан ишончномасиз иш юритади.

97. Кузатув кенгаши банк Бошқаруви раиси, банк Бошқаруви аъзолари билан тузилган шартномани, улар шартнома шартларини бузган тақдирда, шунингдек ушбу Уставни қўпол тарзда бузса ёки уларнинг ҳаракатлари (ҳаракатсизлиги) туфайли банкка

зарар етказилган бўлса, муддатидан олдин тугатиш (бекор қилиш) ҳуқуқига эга.

98. Кузатув кенгаши томонидан банк Бошқаруви раисининг ваколатларини тугатиш тўғрисида қарор қабул қилинган тақдирда, банк Бошқаруви раисининг ваколатларини бошқа шахсга ўтказиш тўғрисидаги масала ўша йиғилишнинг ўзида ҳал этилиши ёхуд банк Бошқарувининг раиси вазифасини вақтинча бажарувчи шахсни тайинлаган ҳолда Ягона акциядор томонидан кўриб чиқиш учун қолдирилиши мумкин.

99. Банк Бошқаруви раисининг ваколатларини тугатиш тўғрисида қарор қабул қилган Кузатув кенгаши банк Бошқаруви раиси вазифасини вақтинча бажарувчи шахсни тайинлаш тўғрисида қарор қабул қилади, шунингдек банк Бошқаруви раиси тўғрисидаги масалани ҳал этиш учун Ягона акциядор муҳокамасига киритади.

100. Банк Бошқаруви раиси:

Ягона акциядор, Кузатув кенгашининг қарорлари ижросини таъминлайди;

банк номидан ишончномасиз иш юритади, бошқа ташкилотлар билан ўзаро муносабатларда унинг манфаатларини ифодалайди;

Ўзбекистон Республикаси қонун ҳужжатлари ва ушбу Уставда белгиланган доираларда банкнинг мол-мулк ва пул маблағларини тасарруф этади;

қоидалар, иш тартиби ва бошқа ички ҳужжатларини тасдиқлайди, Ягона акциядор, Кузатув кенгаши ва банк Бошқаруви томонидан тасдиқланадиган ички ҳужжатлар бундан мустасно;

банк Бошқаруви томонидан тасдиқланган ички ҳужжатларни имзолайди;

банк, банк хизматлари марказлари ва Республика ташқарисида очиладиган филиал ва ваколатхоналарнинг штат жадвалларини тасдиқлайди;

ишончномалар беради;

банкларда банкнинг вакиллик, валюта, ҳисоб-рақамлари ва бошқа ҳисоб-рақамларини очади;

бухгалтерия ҳисоби ва ҳисоботини ташкил қилади;

баланс қиймати ёки олиш қиймати битим тузиш тўғрисида қарор қабул қилинаётган санада банк соф активлари миқдорининг беш фоизича бўлган мол-мулкни, кўчмас мулк ва автотранспорт воситаларидан ташқари, сотиб олиш ёки сотиш хусусида битим тузиш тўғрисидаги қарор қабул қилади;

ходимларни, шу жумладан бўлинма, банк хизматлари марказлари, филиал ва ваколатхоналар раҳбарларини ишга қабул қилади ва ишдан бўшатади;

банк ходимларини қонун ҳужжатлари, ушбу Устав, Ягона акциядор ва банк Кенгаши томонидан белгиланган тартибда рағбатлантиради, шунингдек уларни интизомий ва моддий жавобгарликка тортади;

банк ходимларининг барчаси учун мажбурий бўлган буйруқлар чиқаради ва кўрсатмалар беради;

Ягона акциядор, Кузатув кенгаши фаолиятини ташкилий техникавий таъминлашни амалга оширади;

Ўзбекистон Республикаси қонун ҳужжатлари ва ушбу Уставга мувофиқ банк фаолиятининг бошқа кундалик масалаларини ҳал қилади.

X. БАНКНИНГ ҲИСОБИ ВА ҲИСОБОТИ

101. Банк бухгалтерия ҳисобини Марказий банк томонидан белгиланган қоидалар асосида ишлаб чиқилган ички ҳисоб-китоб сиёсатига мувофиқ ташкил этади ва юритади.

102. Банк молиявий ҳисоботларнинг халқаро стандартларини қўллаши мумкин.

103. Банкдаги бухгалтерия ҳисоби:

бошқарувга, молияга, солиққа ва назоратга оид ҳисоботнинг ҳамда бошқа

ҳисоботларнинг ишончилигини, уларда банкнинг ҳақиқий молиявий ҳолати ва фаолияти натижалари акс эттирилишини;

банк активларини ва юзага келувчи таваккалчиликларни бошқариш хавфсизлигини;

банк Ягона акциядори ва Кузатув кенгаши томонидан банкнинг молиявий аҳволини ва унинг мансабдор шахсларининг ишини назорат қилиш имкониятини таъминлаши керак.

104. Банкда бухгалтерия ҳисобининг ташкил этилиши, ҳолати ва ишончилиги, тегишли органларга ҳар йилги ҳисобот ва бошқа молиявий ҳисоботлар, шунингдек банкнинг расмий веб-сайтида ва оммавий ахборот воситаларида Ягона акциядорга, кредиторларга тақдим этиладиган банк фаолияти тўғрисидаги маълумотлар ўз вақтида тақдим этилиши учун жавобгарлик амалдаги қонун ҳужжатларига мувофиқ банк Бошқарувининг зиммасида бўлади.

105. Банк Марказий банкка молиявий ва назорат ҳисоботларини, шунингдек ўз фаолияти тўғрисидаги ҳисоботларни Марказий банк томонидан белгиланган шаклларда, тартибда ва муддатларда тузади ҳамда Марказий банкка тақдим этади. Банк Марказий банкнинг талабига кўра консолидациялашган, даврий, шунингдек бир марталик ҳисоботларни тақдим этади.

Банк Марказий банкка тақдим этиладиган ҳисоботларнинг ва бошқа маълумотларнинг тўлиқлиги ҳамда ишончилиги учун жавобгардир.

Банк қонун ҳужжатларига мувофиқ бошқа турдаги ҳисоботларни ҳам тақдим этади.

106. Банкнинг молиявий ҳисоботларида кўрсатилган ва Ягона акциядорга тақдим этиладиган молиявий ҳисоботдаги, бухгалтерия балансидаги, фойда ва зарарлар ҳисобварағидаги маълумотларнинг ишончилиги мулкӣ манфаатлари банк ёки унинг Ягона акциядори билан боғлиқ бўлмаган аудиторлик ташкилоти (кейинги матнларда - мустақил аудиторлик ташкилоти) томонидан тасдиқланган бўлиши керак.

107. Банкнинг йиллик ҳисоботи қонун ҳужжатларида белгиланган муддатдан кечиктирмай Кузатув кенгаши томонидан дастлабки тарзда тасдиқланиши лозим.

108. Банкнинг молиявий йили 1 январда бошланади ва 31 декабрда тугайди.

109. Банк молиявий ҳисоботларни, уларда кўрсатилган маълумотларнинг тўғрилигини аудиторлик ташкилоти тасдиқлаганидан кейин Марказий банк томонидан белгиланадиган шаклда эълон қилади.

110. Банк Аудитнинг халқаро стандартлари асосида ташки аудитдан ўтказилганидан сўнг Молиявий ҳисоботларнинг халқаро стандартлари асосида тузилган йиллик молиявий ҳисоботларини қонунчиликда белгиланган муддатларда эълон қилиши шарт.

111. Банк ўз маблағларига, капиталга доир талабларнинг бажарилишига, ликвидликка, таваккалчиликларнинг қиймати ва бошқа муҳим кўрсаткичларга (нормативларга) доир ахборотни ошкор этиши керак.

XI БАНКНИНГ МОЛИЯ-ХЎЖАЛИК ФАОЛИЯТИНИ НАЗОРАТ ҚИЛИШ

112. Ички аудит хизмати банк Бошқаруви, банк хизматлари марказлари, филиаллари ва ваколатхоналари томонидан қонун ҳужжатларига, банк Уставига ва бошқа ҳужжатларга риоя этилишини, бухгалтерия ҳисобида ва молиявий ҳисоботларда маълумотларнинг тўлиқ ҳамда ишончли тарзда акс эттирилиши таъминланишини,

хўжалик операцияларини амалга оширишнинг белгиланган қоидалари ва тартиб-таомилларига риоя этилишини, активларнинг сақланишини, шунингдек банкни бошқариш юзасидан қонун ҳужжатларида белгиланган талабларга риоя этилишини текшириш ва бу борада мониторинг олиб бориш орқали уларнинг ишини назорат қилади ҳамда баҳолайди.

113. Ички аудит хизмати банк Кузатув кенгаши олдида ҳисобдордир.

114. Банк аудити мустақил аудиторлик ташкилотлари томонидан ҳар йили ўтказилади. Аудиторлик ташкилоти банк билан тузилган шартномага мувофиқ қонун ҳужжатларида белгиланган тартибда банкнинг молия-хўжалик фаолиятини текширилишини амалга оширади ва унга аудиторлик хулосасини тақдим этади.

115. Банкнинг аудиторлик текшируви Марказий банкнинг талабига кўра умуман банкнинг фаолияти бўйича ҳам, шунингдек банк фаолиятининг алоҳида йўналишлари бўйича ҳам ўтказилиши мумкин.

116. Банк аудиторлик текширувининг мақсади банкнинг молиявий ахбороти ҳамда бошқа молиявий маълумотлари тўғрилигини ва бухгалтерия ҳисоби тўғрисидаги қонун ҳужжатларига ҳамда молиявий ҳисоботларга оид халқаро стандартларга мувофиқлигини аудиторлик ташкилоти томонидан аниқлашдан иборат.

117. Банкнинг йиллик молиявий ҳисоботи тўғрисидаги аудиторлик хулосаси қонунда назарда тутилганидан ташқари, аудиторлик ташкилоти томонидан:

банк томонидан ҳисобот санасидаги ҳолатга кўра пруденциал нормативларнинг бажарилишини;

банкнинг ички назорати ва таваккалчиликларини бошқариш тизимларининг ташкил этилиши Марказий банк томонидан қўйилган талабларга мувофиқлигини текшириш натижаларини ўз ичига олган бўлиши керак.

118. Аудиторлик ташкилоти банкнинг молиявий ҳисоботи ва молияга доир бошқа ахборотлар ҳақида нотўғри хулосани ўз ичига олган аудиторлик хулосаси тузганлик оқибатида етказилган зарар учун банк олдида жавобгар бўлади.

XI. БАНКНИ ҚАЙТА ТАШКИЛ ҚИЛИШ ВА ТУГАТИШ

119. Банкни қайта ташкил қилиш амалдаги қонун ҳужжатларига мувофиқ Ягона акциядор қарорига асосан, Марказий банк рухсати билан, ёки Марказий банк талаби билан амалга оширилади.

Банкни қайта ташкил қилиш бирлаштириш, қўшиб олиш, бўлиш, ажратиб чиқариш ва айлантириш шаклларида амалга оширилиши мумкин.

Қайта ташкил қилишда банк таъсис ҳужжатларига тегишли ўзгартиришлар киритилади.

120. Банкнинг фаолиятини тугатиш ва банкни тугатиш ихтиёрий ёки мажбурий (Марказий банк томонидан лицензия чақириб олинганда) шаклда амалга оширилиши мумкин.

Банкнинг фаолиятини тугатиш ва банкни тугатиш учун:

банк Ягона акциядорининг банкни ихтиёрий тугатиш тўғрисидаги қарори;

Марказий банк бошқарувининг банкни мажбурий тугатиш ҳақидаги қарори асос бўлади.

Банкнинг фаолиятини тугатиш ва банкни тугатиш, шу жумладан ихтиёрий шаклда тугатиш тартиби Марказий банк томонидан белгиланади.

121. Ихтиёрий тугатиш банк Ягона акциядорининг ихтиёрий тугатиш тўғрисидаги қарори асосида, кредиторлар ва омонатчиларнинг талабларини олинганди амалга оширилади.

Банкни ихтиёрий тугатиш тўғрисидаги қарор Ягона акциядор томонидан қабул қилинади.

Банк Марказий банкка Ягона акциядор томонидан банкни ихтиёрий тугатиш тўғрисида қабул қилинган қарор ҳақида дарҳол ёзма шаклда хабар бериши шарт.

122. Банк Марказий банк Бошқарувининг лицензияни чақариб олиш тўғрисидаги қарори асосида мажбурий тугатилади.

Банкни мажбурий тугатиш чоғида тугатиш комиссияси Марказий банк томонидан тайинланади.

Марказий банк тугатиш комиссияси таркибига Марказий банк ходимларини киритишга ҳақли.

123. Банк тугатилаётганда барча кредитор ва омонатчилар талаблари инобатга олинади. Кредиторлар ва омонатчилар билан ҳисоб-китоб тугагандан кейин, банкнинг қолган мол-мулки тугатувчи томонидан қонун ҳужжатларида белгиланган тартибда Ягона акциядорга ўтказилади.

Имтиёзли акцияларни тугатилиш қиймати уларнинг номинал қиматининг 100 фоизига тенг.

124. Банкни тугатиш Банкларнинг давлат реестрига тегишли ёзув киритилган кундан эътиборан тамомланган деб ва банк тугатилган деб ҳисобланади.


125. Банк тугатилганлиги ҳақидаги тегишли ёзувни Марказий банк Ўзбекистон Республикасининг Молия вазирлиги томонидан банк қимматли қоғозларини Эмиссиявий қимматли қоғозлар ягона давлат реестридан чиқарилганидан кейингина киритади.

ХII. БАНК УСТАВИГА ЎЗГАРТИРИШ ВА ҚЎШИМЧАЛАР КИРИТИШ

126. Ягона акциядор қарори билан банк Уставига киритилган барча ўзгартириш ва қўшимчалар давлат рўйхатидан ўтказилиши лозим.

127. Банк Уставига ўзгартириш ва қўшимчалар киритиш ёки банк Уставини янги таҳрирда қабул қилиш банкни рўйхатга олиш учун Ўзбекистон Республикаси қонун ҳуддатларида кўрсатилган тартибда давлат рўйхатидан ўткалиши лозим.

128. Банк Уставига ўзгартириш ва қўшимчалар киритиш ёки банк Уставини янги таҳрирда қабул қилиш учинчи шахслар учун Марказий банк томонидан давлат рўйхатидан ўтказилган вақтдан кучга қиради.


О.Г.Амеркулов
Банк Кузатув Кенгаши Раиси

“РЎЙХАТГА ОЛИНГАН”

Ўзбекистон Республикаси
Марказий банки томонидан
2023 йил “7” июль да
92/1 сон



**“ЯНГИ БАНК”
АКЦИЯДОРЛИК ЖАМИЯТИ
УСТАВИГА ЎЗГАРТИРИШЛАР**

“ЯНГИ БАНК” акциядорлик
жамиятининг ягона акциядори
масъулияти чекланган жамияти
“YANGI-GROUP” шаклидаги
хорижий корхонаси ягона
иштирокчисининг
2023 йил “4” июль даги
сонли қарори билан



**“ЯНГИ БАНК”
АКЦИЯДОРЛИК ЖАМИЯТИ
УСТАВИГА ЎЗГАРТИРИШЛАР**

Банк уставининг 30-чи банди қуйдаги таҳрирда баён этилсин:

“30. Банкнинг устав капитали 100 000 000 000 (бир юз миллиард) сўмни ташкил этади ва қуйдаги акцияларга тақсимланади:

эгасининг номи ёзилган оддий акциялар - номинал қиймати 1 000 (бир минг) сўм бўлган 100 000 000 (бир юз миллион) дона миқдорда.

Банк томонидан устав капиталини кўпайтириш мақсадида чиқариладиган эълон қилинган қўшимча акцияларнинг суммаси 400 000 000 000 (тўрт юз миллиард) сўмни ташкил этади, шу жумладан:

оддий эгаси ёзилган акциялар – номинал қиймати 1 000 (бир минг) сўм бўлган 400 000 000 (тўрт юз миллион) дона миқдорда”



О.Ғ. Амеркулов

Банк Кузатув Кенгаши Раиси

“РЎЙХАТГА ОЛИНГАН”

Ўзбекистон Республикаси
Марказий банки томонидан
2023 йил “10” Октябрь да
92/2 сон



**“ЯНГИ БАНК”
АКЦИЯДОРЛИК ЖАМИЯТИ
УСТАВИГА ЎЗГАРТИРИШ**

“ЯНГИ БАНК” акциядорлик
жамиятининг ягона акциядори
масъулияти чекланган жамияти
“YANGI-GROUP” шаклидаги
хорижий корхонаси ягона
иштирокчисининг
2023 йил 05 октябрдаги
4-сонли қарори билан
“ТАСДИҚЛАНГАН”
Yangi
bank
О.Г. Амеркулов
Банк Қузатув Кенгаши Раиси

**“ЯНГИ БАНК”
АКЦИЯДОРЛИК ЖАМИЯТИ
УСТАВИГА ЎЗГАРТИРИШ**

Банк уставининг 30-чи банди қуйдаги тахрирда баён этилсин:

“30. Банкнинг устав капитали 200 000 000 000 (икки юз миллиард) сўмни ташкил этади ва қуйдаги акцияларга тақсимланади:

эгасининг номи ёзилган оддий акциялар - номинал қиймати 1 000 (бир минг) сўм бўлган 200 000 000 (икки юз миллион) дона миқдорда.

Банк томонидан устав капиталини кўпайтириш мақсадида чиқариладиган эълон қилинган қўшимча акцияларнинг суммаси 300 000 000 000 (уч юз миллиард) сўмни ташкил этади, шу жумладан:

оддий эгаси ёзилган акциялар – номинал қиймати 1 000 (бир минг) сўм бўлган 300 000 000 (уч юз миллион) дона миқдорда”



Амеркулов О.Г.

Банк Кузатув Кенгаши Раиси